


欽定四庫全書

子部

備急千金要方卷

二十九至
三十一



詳校官太醫院醫士臣針岱

編修臣倉聖脈覆勘

欽定四庫全書

備急千金要方卷二十九

唐 孫思邈 撰

宋 林億等 校正

傷寒方

傷寒例第一

論曰易稱天地變化各正性命然則變化之迹無方性

命之功難測故有炎涼寒燥風雨晦冥水旱妖災蟲蝗

怪異四時八節種種施化不同七十二候日月運行各

別終其晷度方得成年是謂歲功畢矣天地尚且如然
在人安可無事故人生天地之間命有遭際時有否泰
吉凶悔各苦樂安危喜怒愛憎存亡憂畏關心之慮日
有千條謀身之道時生萬計乃度一日是故天無一歲
不寒暑人無一日不憂喜故有天行瘟疫病者即天地
變化之一氣也斯蓋造化必然之理不得無之故聖人
雖有補天立極之德而不能廢之雖不能廢之而能以
道御之其次有賢人善于攝生能知搏節與時推移亦

得保全天地有斯瘴癘還以天地所生之物以防備之
命曰知方則病無所侵矣然此病也俗人謂之橫病多
不解治皆曰日滿自差以此致枉者天下大半凡始覺
不佳即須救療迄至于病愈湯食競進折其毒勢自然而
差必不可令病氣自在恣意攻人拱手待斃斯為誤矣今
博採羣經以為上下兩卷廣設備擬好養者可得詳焉
小品曰古今相傳稱傷寒為難治之疾時行瘟疫是毒
病之氣而論治者不判傷寒與時行瘟疫為異氣耳云

傷寒是雅士之辭天行瘟疫是田舍間號耳不說病之異同也考之衆經其實殊異矣所宜不同方說宜別是以略說其要經言春氣溫和夏氣暑熱秋氣清涼冬氣凜冽此四時正氣之序也冬時嚴寒萬類深藏君子固密則不傷于寒或觸冒之者乃為傷寒耳其傷于四時之氣皆能為病而以傷寒為毒者以其最為殺厲之氣也中而即病名曰傷寒不即病者其寒毒藏于肌膚中至春變為溫病至夏變為暑病暑病熱極重于溫也是

以辛苦之人春夏多溫病熱病者皆由冬時觸冒寒冷
之所致非時行之氣也凡時行者是春時應暖而反大
寒夏時應熱而反大冷秋時應涼而反大熱冬時應寒
而反大溫此非其時而有其氣是以一歲之中病無長
少多相似者此則時行之氣也傷寒之病逐日深淺以
施方治今世人得傷寒或始不早治或治不去病或日
數久淹困乃告師師苟依方次第而療則不中病皆宜
臨時消息制方乃有效耳

華佗曰夫傷寒始得一日在皮當摩膏火灸之即愈若不解者二日在膚可依法針服解肌散發汗汗出即愈即不解至三日在肌復一發汗即愈若不解者止勿復發汗也至四日在胸宜服藜蘆圓微吐之則愈若病困藜蘆圓不能吐者服小豆瓜蒂散吐之則愈也視病尚未醒醒者復一法針之五日在腹六日入胃入胃乃可下也若熱毒在外未入于胃而先下之者其熱乘虛入胃即爛胃也然熱入胃須要下去之不可留于胃中也

胃若實熱為病三死一生皆不愈胃虛熱入爛胃也其
熱微者赤斑出此候五死一生劇者黑斑出者此候十
死一生但論人有強弱病有難易得效相倍也得病無
熱但狂言煩躁不安精彩言語不與人相主當者勿以
火迫之但以猪苓散一方寸匕服之當逼與新汲水一
升若二升強飲之令以指刺喉中吐之病隨手愈若不
能吐者勿強與水水停則結心下也當更以餘藥吐之
皆令相主不爾更致危矣若此病革不時以猪苓散吐

解之者其死殆速耳亦可先以去毒物及法針之尤佳
夫飲膈實者此皆難治此則三死一生也病者過日不
以時下則熱不得泄亦胃爛斑出春夏無大吐下秋冬
無大發汗發汗法冬及始春大寒時宜服神丹圓亦可
摩膏火灸若春末及夏月始秋此熱月不宜火灸及重
覆宜服六物青散若崔文行度瘴散赤散雪煎亦善若
無圓散及煎者但單煮柴胡數兩傷寒時行亦可服以
發汗至再三發汗不解當與湯實者轉下之其脉朝夕

馱者為滯實者朝平夕馱者非滯也轉下湯為可早與
但當少與勿令大下耳少與當數其間也諸虛煩熱者
與傷寒相似然不惡寒身不疼痛故知非傷寒也不可
發汗頭不痛脉不緊數故知非裏實不可下也如此內
外皆不可攻而強攻之必遂損竭多死難全也此虛煩
但當與竹葉湯若嘔者與橘皮湯一劑不愈為可重與
也此法數用甚有效驗傷寒後虛煩亦宜服此湯

王叔和曰夫陽盛陰虛

外臺作表
和裏病

汗之則死下之則愈

陽虛陰盛

外臺則裏和表病

下之則死汗之則愈夫如是則神

丹安可以誤發甘遂何可以妄攻虛盛之治

外臺作表裏之病

相背千里吉凶之機應若影響然則桂枝下咽陽盛則

斃

外臺作表

承氣入胃陰盛以亡

外臺作裏

若此陰陽

虛實之交錯其候至微發汗吐下之相反其禍至速而

醫術淺狹不知不識病者殞沒自謂其分至今冤魂塞

於冥路天死盈于曠野仁愛鑒此寧不傷楚夫傷寒病

者起自風寒入于腠理與精氣分爭榮衛否隔周行不

通病一日至二日氣在孔竅皮膚之間故病者頭痛惡寒腰背強重此邪氣在表發汗則愈三日以上氣浮在上部填塞胸心故頭痛胃中滿當吐之則愈五日以上氣沉結在臟故腹脹身重骨節煩疼當下之則愈明當消息病之狀候不可亂投湯藥虛其胃氣也經言脉微不可吐虛細不可下又夏月亦不可下也此醫之大禁也脉有沉浮轉能變化或人得病數日方以告醫雖云初覺視病已積日在身其疹瘵結成非復發汗解肌所

除當胗其脉隨時形勢救解求免也不可苟以次第為固失其機要乃致禍矣此傷寒次第病三日以內發汗者謂當風解衣夜卧失覆寒温所中并時有疾疫邪風之氣相染易為邪惡所中也至于人自飲食生冷過多腹臟不消轉動稍難頭痛身温其脉實大者便可吐下之不可發汗也

陳廩丘云或問得病連服湯藥發汗汗不出如之何答曰醫經云連發汗汗不出者死病也吾思之可蒸之如

蒸中風法熱溫之氣於外迎之不得不汗出也後以問
張苗苗云曾有人作事疲極汗出卧單簟中冷得病但苦
寒倦諸醫與圓散湯四日之內凡八過發汗汗不出苗
令燒地布桃葉蒸之即得大汗於被中就粉傅身使極
燥乃起便愈後數以此發汗汗皆出也人性自有難汗
者非惟病使其然也蒸之則無不汗出也諸病發熱惡
寒脉浮洪者便宜發汗溫粉粉之勿令遇風當發汗而
其人適失血及下大利則不可大汗也數少與桂枝湯

使體潤熱熱汗出連日當自解也

論曰凡人有少苦似不如平常即須早道若隱忍不治冀望自差須臾之間以成痼疾小兒女子益以滋甚若時氣不和當自戒謹若小有不和即須治療尋其邪由及在腠理以時早治鮮不愈者患人忍之數日乃說邪氣入臟則難可制止雖和緩亦無能為也癰疽疔腫喉痺客忤尤其為急此自養生之要也凡作湯藥不可避晨夜時日吉凶覺痛須臾即宜便治不等早晚則易愈

矣服藥當如方法若縱意違師不須治之也凡傷寒多
從風寒得之始表中風寒入裏則不消矣未有溫覆而
當不消也凡得時氣病五六日而渴欲飲水飲不能多
不當與也所以爾者腹中熱尚少不能消之便更為人
作病矣若至七八日大渴欲飲水者猶當依證而與之
與之勿令極意也言能飲一斗者與五升若飲而腹滿
小便澁若喘若噦不可與之勿然大汗出者欲自愈也
人得病能飲水欲愈也

凡溫病可針刺五十九穴又身之穴三百六十有五其三十六穴灸之有害七十九穴刺之為災

論曰夫尋方學之要以救速為貴是以養生之家須預合成熟藥以補倉卒之急今具之于左

辟溫第二

方濕墮病證

屠蘇酒辟疫氣令人不染溫病及傷寒歲旦之方

大黃 十五銖

白朮 十八銖

桔梗

蜀椒 各十五銖

桂心 十八銖

烏頭 六兩

菝葜 十二銖

右七味以咀絳袋盛以十二月晦日中懸沉井中令
至泥正月朔旦平曉出藥置酒中煎數沸於東向戶
中飲之屠蘇之飲先從小起多少自在一人飲一家
無疫一家飲一里無疫飲藥酒得三朝還淨置井中
能仍歲飲可世無病當家内外有井皆悉著藥辟温
氣也又一方有防風一兩

大乙流金散辟温氣方

雄黃

三兩

雌黃

二兩

礬石

一兩半

鬼箭羽

一兩半

羚羊角 燒二兩

右五味治下篩三角絳袋盛一兩帶心前并掛門戶
上若逢大疫之年以月旦青布裹一刀圭中庭燒之
溫病人亦燒薰之

雄黃散辟溫氣方

雄黃 五兩

朱砂 一作赤木

菖蒲

鬼臼 各二兩

右四味治下篩以塗五心額上鼻人中及耳門

預備一物栢枝散天氣不和疾病流行方

取南向社中栢東南枝曝令乾擣末酒服方寸匕神良

粉身散辟温病常用方

芎藭

白芷

藁本

各等分

右三味治下篩内米粉中以粉身

殺鬼燒藥方辟温氣

雄黃

丹砂

雌黃

各一斤

羚羊角

殺羊角亦得

蕪荑

虎骨

鬼臼

鬼箭羽

野丈人

石長生

猴猪尿

馬懸蹄 各三兩

青羊脂

菖蒲

白木 各八兩

蜜蠟 八斤

右十六味末之以蜜蠟和為丸如彈許大朝暮及夜

中戶前微火燒之

虎頭殺鬼圓辟温方

虎頭 五兩

朱砂

雄黃

雌黃 各一兩半

鬼臼

皂莢

蕪荑 各一兩

右七味末之以蜜蠟和為丸如彈子大絳袋盛繫臂
男左女右懸屋四角晦望夜半中庭燒一圓

辟温殺鬼圓熏百鬼惡氣方

雄黃

雌黃

各二兩

殺羊角

虎骨

各七兩

龍骨

龜甲

鮫鯉甲

蝟皮

各三兩

樗雞

十五枚

空青

一兩

芎藭

真珠

各五兩

東門上雞頭

一兩

右十三味末之烱蠟二十兩并手圓如梧子正旦門

戶前燒一圓帶一圓男左女右辟百惡獨宿吊喪問
病各吞一圓小豆大天陰大霧日燒一圓於戶牖前
佳

雄黃圓漢建炎二年太歲在酉疫氣流行死者極衆即
有書生丁季迴從蜀青城山來東過南陽從西市門入
見患疫癘者頗多遂于囊中出藥人各惠之一圓靈藥
霑唇疾無不瘥市中疫鬼數百餘見書生施藥悉皆驚
怖而走乃有鬼王見書生謂有道法兼自施藥感衆鬼

等奔走若是遂詣書生欲求受其道法書生曰吾無道
法乃囊中之藥呈于鬼王鬼王覩藥驚惶扣頭乞命而
走此方藥帶之入山能辟虎狼蛇蟲入水能除水怪蛟
蜃

雄黃

雌黃

曾青

鬼臼

真珠

丹砂

虎頭骨

桔梗

白朮

女青

芎藭

白芷

鬼督郵

蕪荑

鬼箭羽

藜蘆

菖蒲

皂莢

各一兩

右十八味末之蜜丸如彈子大絹袋盛男左女右帶之卒中惡病及時疫吞如梧子一丸燒一丸彈子戶

內

赤散辟温疫氣傷寒熱病方

藜蘆

躑躅花

各一兩

牡丹皮

皂莢

各一兩六銖

附子

桂心

真珠

各六兩

細辛

乾薑

各十八銖

右九味末之內真珠合治之分一方寸匕置絳囊中帶之男左女右着臂自隨覺有病之時便以粟米大內著鼻中又酒服一錢匕覆取汗日三服當取一過汗耳

又方正月旦取東行桑根如指長七寸以丹塗之懸門戶上又令人帶之

斷溫病不相染著方

汲水瓶一長七寸盜著病人卧席下良

又方以繩度所住戶中壁屈繩即斷之

治溫病不相染方

以桃樹蠹屎末之水服方寸匕

又方术豉等分酒漬服之妙

又方正旦吞麻子赤小豆各二七粒又以二七粒投井

中

又方新布袋盛赤豆一升內井中三日出舉家服二七

枚

又方松葉末之酒服方寸七日三服

又方常以七月七日合家吞赤小豆向日吞二七枚

又方常以七月七日男吞大豆七枚女吞小豆二七枚

又方神仙教人立春後有庚子日溫蕪菁菹汁合家大小並服不限多少

斷溫疫轉相染著乃至滅門延及外人無收視者方

赤小豆

鬼箭羽

鬼臼

雄黃

各二兩

右四味末之以蜜和服如小豆一丸可與病人同床

傳衣

治溫令不相染方

新布袋盛大豆一升內井中一宿出服七枚

治溫疫方

藥子二枚末水服之

又方白蜜和上色朱砂粉一兩以太歲日平旦大小勿食向東方立吞服三七丸如麻子大勿令齒近之并吞赤小豆七枚投井泉中終身勿忘此法

又方凡時行疫癘常以月望日細剉東引桃枝煮湯浴之

治瘴氣方

蒜五子并皮碎之

豉心一升

右二味以三歲男兒尿二升煮五六沸去滓服之良又方青竹茹二升以水四升煮取三升分作三服

治患霧氣者心內煩悶少氣頭痛項急起則眼眩欲倒身微熱戰掉不安時復增寒心中欲吐吐時無物方

新猪屎二升半内好酒一升攪令散以生布絞取汁
 更以綿濾頓服之取盡即地鋪暖卧覆蓋鋪前著火
 常汗出若得汗當細細去上衣勿使心寒寒即不差
 看汗自乾乃起慎風冷亦治瘡及風勞蟲毒

治肝腑臟温病陰陽毒頸背雙筋牽先寒後熱腰强急
 縮目中生花方

桂心

一兩

白朮

芒硝

大青

梔子

各三兩

柴胡

五兩

石膏

生薑

各八兩

生地黃

香豉各一升

右十味㕮咀水九升煮取三升分三服

治肝腑温病陰陽毒先寒後熱頸筋攣牽面目赤黃身中直强方

玄參

一兩

細辛

二兩

梔子

黃芩

升麻

芒硝

各三兩

石膏

八兩

竹葉

切五升

車前草

曝切二升

右九味㕮咀以水一斗半煮竹葉車前取七升去滓

下諸藥煎至三升芒硝分三服

治心腑臟溫病陰陽毒戰掉不安驚動方

大青

黃芩

梔子

知母

芒硝

各三兩

麻黃

四兩

玄參

六兩

石膏

生葛根

各八兩

生地黄

切一升

右十味以水九升煮取三升去滓下芒硝分三

服

治脾腑臟溫病陰陽毒頭重頸直皮肉痺結核隱起方

大青

羚羊角

升麻

射干

芒硝

各三兩

梔子

四兩

寒水石

五兩

玄參

八兩

右八味㕮咀以水七升煮取三升分三服

治肺腑臟溫病陰陽毒咳嗽連續聲不絕嘔逆方

麻黃

梔子

紫菀

大青

玄參

葛根

桂心

甘草

各三兩

各二兩

杏仁

前胡

石膏

各四兩

八兩

右十一味㕮咀以水九升煮取三升分作三服

治腎腑臟溫病身面如刺腰中欲折熱毒內傷方

茵陳蒿

梔子

芒硝各三兩

苦參

生葛

各四兩

生地黃

石膏

各八兩

蔥白

豉各一升

右九味哎咀以水九升煮取二升半下芒硝分三服

萎蕤湯治溫風之病脉陰陽俱浮汗出體重其息必喘

其形狀不仁嘿嘿但欲眠下之者則小便難發其汗者

必讖語加燒針者則耳聾難言但吐下之則遺失便利

如此疾者宜服之方

姜蕤

白薇

麻黃

獨活

杏仁

芎藭

甘草

青木香

各二兩

石膏

三兩

右九味咬咀以水八升煮取三升去滓分三服取汗
若一寒一熱加朴硝一分及大黃三兩下之如無木

香可用麝香一分

小品方云姜蕤湯治冬溫冬春月中風傷寒則發熱頭腦痛咽喉乾

舌強骨肉疼心胸痞
滿腰背強亦治風溫

夫蠶病與百合狐惑濕風溫病鬼魅皆相類宜精察節
氣其新故二氣相搏喜成此疾

備急千金要方卷二十九

欽定四庫全書

備急千金要方卷三十

唐 孫思邈 撰

宋 林億等 校正

傷寒方

傷寒膏第三方

青膏治傷寒頭痛項強四肢煩疼方

當歸

芍藥

蜀椒

白芷

吳茱萸

附子

烏頭

甘草

各三兩

右八味㕮咀以醇苦酒漬之再宿以猪脂四斤煎令
 藥色黃絞去滓以温酒服棗核大三枚日三服取汗
 不知稍增可服可摩如初得傷寒一日苦頭痛背强
 宜摩之佳

黃膏治傷寒赤色頭痛項强賊風走風方

大黃

附子

細辛

乾薑

蜀椒

桂心

各半兩

巴豆

五十枚

右七味㕮咀以醇苦酒漬一宿以臘月猪脂一斤煎

之調適其火三上三下藥成傷寒赤色發熱酒服梧
子大一枚又以火摩身數百過兼治賊風絕良風走
肌膚遊風所在摩之神效千金不傳此趙泉方也

白膏治傷寒頭痛向火摩身體酒服如杏核一枚溫覆
取汗摩身當千過藥力乃行并治惡瘡小兒頭瘡牛領
馬鞍皆治之先以鹽湯洗瘡以布拭之傅膏癰腫火灸
摩千過日再自消者方

天雄

烏頭

莽草

羊躑躅

各三兩

右四味呔咀以苦酒三升漬一夕作東向露竈又作
十二聚濕土各一升許大取成煎猪脂三斤著銅器
中加竈上炊以葦薪令釋內所漬藥炊令沸下著土
聚上沸定復上如是十二過令土盡徧藥成去滓傷
寒咽喉痛含如棗核一枚日三摩時令勿近目

發汗散第四方

度瘴發汗青散治傷寒赤色惡寒發熱頭痛項強體疼

方

麻黃 三兩半

桔梗

細辛

吳茱萸

防風

白朮 各一兩

烏頭

乾薑

蜀椒

桂心 各一兩六銖

右十味治下篩溫酒服方寸匕溫覆取汗汗出止若

不得汗汗少不解復服如法若得汗足如故頭痛發

熱此為內實當服駛豉圓若藿氏圓如得便頭重者

可以二大豆許內鼻孔中覺燥涕出一日可三四度

必愈兼辟時行病

五苓散主時行熱病但狂言煩躁不安精彩言語不與人相主當者方

猪苓

白朮

茯苓

各十銖

桂心

十二銖

澤瀉

三十銖

右五味治下篩水服方寸匕日三多飲水汗出即愈

崔文行解散治時氣不和傷寒發熱者方

桔梗

細辛

各四兩

白朮

八兩

烏頭

一斤

右四味治下篩若中傷寒服錢五匕覆取汗解若不

覺復小增之以知為度若時氣不和旦服錢五匕辟
惡氣欲省病服一服皆酒服

六物青散治傷寒赤色惡寒方

附子

白朮

各一兩
六銖

防風

細辛

各一兩
十八銖

桔梗

烏頭

各三兩
十八銖

右六味治下篩以溫酒服五匕不知稍增之服後食
頃不汗出者進溫粥一杯以發之溫覆汗漿漿可也
勿令流離勿出手足也汗出止若汗大出不止者溫

粉粉之微者不須粉不得汗者當更服之得汗而不

解者當服神丹丸

方出下篇
發汗丸門

青散治春傷寒頭痛發熱方

苦參

厚朴

石膏

各三
十銖

大黃

細辛

各二
兩

麻黃

五
兩

烏頭

五
枚

右七味治下篩覺傷寒頭痛發熱以白湯半升和藥

方寸匕投湯中熟訖去滓盡服覆取汗汗出溫粉粉

之良久一服不除宜重服之或當微下利者有大黃

故也

詔書發汗白薇散治傷寒三日不解者方

白薇十二銖

杏仁

貝母各十八銖

麻黃一兩八銖

右四味治下篩酒服方寸匕自覆汗出即愈

華佗赤散治傷寒頭痛身熱腰背強引頸及風口噤瘡不絕婦人產後中風寒經氣腹大方

丹砂十二銖

蜀椒

蜀漆

乾薑

細辛

黃芩

防已

桂心

茯苓

人參

沙參

桔梗

女萎

烏頭

各十
八銖

雄黃

二十
四銖

吳茱萸

三十
銖

麻黃

代赭

各二
兩半

右十八味治下篩酒服方寸匕日三耐藥者二匕覆

令汗出欲治瘧先發一時所服藥二匕半以意消息

之細辛薑桂丹砂雄黃不爇餘皆爇之

赤散治傷寒頭痛項强身熱腰脊痛往來有時方

乾薑

防風

沙參

細辛

白朮

人參

蜀椒

茯苓

麻黃

黃芩

代赭

桔梗

吳茱萸

各一兩

附子

二兩

右十四味治下篩先食酒服一錢匕日三

烏頭赤散治天行疫氣病方

烏頭

一兩半

皂莢

半兩

雄黃

細辛

桔梗

大黃

各一兩

右六味治下篩清酒若井花水服一升圭日二不知

稍增以知為度除時氣疫病若牛馬六畜中水行疫亦可與方寸匕人始得病一日時服一刀圭取兩大豆許吹著兩鼻孔中

水解散治時行頭痛壯熱一二日方

桂心

甘草

大黃

各二兩

麻黃

四兩

右四味治下篩患者以生熟湯浴訖以暖水服方寸

匕日三覆取汗或利便差丁強人服二方寸匕

延年秘錄

有黃芩芍藥各二兩古今錄驗無甘草有芍藥治天行熱病生疱瘡疼痛及解肌出汗

治時病表裏大熱欲死方

大黃

寒水石

芒硝

石膏

升麻

麻黃

葛根

紫葛

右八味等分治下篩水服方寸匕日二

發汗湯第五

方例

桂枝證

例曰大法春夏宜發汗凡發汗欲令手足皆周至熱熱然一時間許益佳但不可令如水流離霹靂耳若病不解當更重發汗汗出多則亡陽陽虛不可重發汗也凡

服湯藥發汗中病便止不必盡劑也凡云可發汗而無湯者圓散亦可用要以汗出為解然不及湯隨證良驗凡病無故自汗出復發其汗愈衛復和故也

夫脉浮者病在外可發汗宜桂枝湯

夫陽脉浮大而數者亦可發汗為宜桂枝湯

夫病常自汗出者此為榮氣和榮氣和而外不解此為衛氣不和也榮行脉中衛行脉外復發其汗衛和則愈

宜桂枝湯

夫病人臟無他病時時發熱自汗出而不愈者此衛氣不和故也先其時發汗則愈宜桂枝湯

太陽病發熱汗出者此為榮弱衛強故令汗出欲掇邪風宜桂枝湯

太陽病頭痛發熱汗出惡風寒宜桂枝湯

太陽病下之微喘者表未解也宜桂枝加厚朴杏仁湯
太陽病外證未解者不可下宜桂枝湯

太陽病先發其汗不解而下之其脉浮者不愈浮為在

外而反下之故令不愈今脉浮故在外當須解其表則愈宜桂枝湯

太陽病下之氣上衝者可與桂枝湯不上衝不可與凡桂枝本為解肌若脉浮緊發熱無汗者勿與之當知此勿誤也

凡酒客勿與桂枝湯若服必嘔

凡服桂枝湯吐者後必吐膿血也

桂枝湯治中風其脉陽浮而陰弱陽浮者熱自發陰弱

者汗自出漉漉惡風浙浙惡寒噏噏發熱鼻鳴乾嘔方

桂枝

芍藥

生薑

各三兩

甘草

二兩

大棗

十二枚

右五味呿咀三物切薑擘棗以水七升煮棗令爛去滓乃內諸藥水少者益之煮令微沸得三升去滓服一升日三小兒以意減之初服少多便得汗出者小潤其間不得汗者小促其間令藥勢相及汗出自護如法特須避風病若重宜夜服若服一劑不解病證

不變者當復服之至有不肯汗出服兩三劑乃愈服此藥食頃飲熱粥以助藥力

麻黃湯治傷寒頭及腰痛身體骨節疼發熱惡寒不汗而喘方

麻黃 三兩

桂心

甘草 各二兩

杏仁 七十枚喘不甚用五十枚

右四味以水九升煮麻黃減二升去沫內諸藥煮取二升半絞去滓服八合覆令汗

大青龍湯治中風傷寒脉浮緊發熱惡寒身體疼痛汗
不出煩躁方

麻黃

兩六

桂心

甘草

各二兩

石膏

如雞子一枚碎

生薑

兩三

杏仁

四十枚

大棗

十二枚

右七味以水九升煮麻黃去沫乃內諸藥煮取

三升分服一升厚覆當大汗出溫粉粉之即止不可

再服服之則筋惕肉瞤此為逆也不汗乃再服

陽毒升麻湯治傷寒一二日便成陰毒或服藥吐下之

後變成陽毒身重腰背痛煩悶不安狂言或走或見鬼
或吐血下痢其脉浮大數面赤斑斑如錦文咽喉痛唾
膿血五日可治至七日不可治宜服方

升麻

甘草 各半兩

當歸

蜀椒

雄黃

桂心 各六銖

右六味以水五升煮取二升半分三服如人行
五里進一服温覆手足毒出則汗汗出則解不解重

作服之得吐亦佳

仲景無桂心有鼈甲手大一片肘後與千金同古今錄驗有梔子六

銖鱉甲如
手一片

陰毒甘草湯治傷寒初病一二日便結成陰毒或服藥
六七日已止至十日變成陰毒身重背強腹中絞痛咽
喉不利毒氣攻心心下堅強短氣不得息嘔逆唇青面
黑四肢厥冷其脉沉細緊數仲景云此陰毒之候身如
被打五六日可治至七日不可治也方

甘草

升麻

各半
兩

當歸

蜀椒

各六
銖

鼈甲

一
兩

右五味㕮咀以水五升煮取二升半分三服如人行

五里頃更進一服溫覆發汗毒當從汗出汗出則愈

若不汗則不除重作服

仲景方
去蜀椒

陰旦湯治傷寒肢節疼痛內寒外熱虛煩方

芍藥

甘草

各二兩

乾薑

黃芩

各三兩

桂心

四兩

大棗

十五枚

右六味㕮咀以水一斗煮取五升去滓溫服一升日

三夜再服令小汗

陽旦湯治傷寒中風脉浮發熱往來汗出惡風頭項強
鼻鳴乾嘔桂枝湯主之隨病加減如左方

以泉水一斗煮取四升分服一升日三自汗者去桂
枝加附子一枚渴者去桂加栝蒌三兩利者去芍藥
桂加乾薑三兩附子一枚炮心下悸者去芍藥加茯
苓四兩虛勞裏急正陽旦主之煎得二升內膠飴半
斤為再服若脉浮緊發熱者不可與之

六物解肌湯治傷寒發熱身體疼痛方

葛根 兩四

茯苓 兩三

麻黃

牡蠣

生薑 兩各二

甘草 兩一

右六味呿咀以水八升煮取二升分三服再服後得

汗汗通即止 古今錄驗無生薑甘草

解肌湯治傷寒溫病方

葛根 兩四

麻黃 兩三

黃芩

芍藥

甘草 兩各二

大棗 枚十二

右六味呿咀以水一斗煮取三升飲一升日三服三

四日不解脉浮者宜重服發汗脉沉實者宜以馱豉

丸下之

延年祕錄有
桂心一兩

治傷寒時氣温疫疼痛壯熱脉盛始得一二日者方

丹砂一兩末之以水一斗煮取一升頓服之覆取汗

治疫氣傷寒三日已前不解者方

好豉

一升
綿裹

蔥白

一升切

小男兒尿

三升

右三味先熬豉蔥令相得則投小便者取二升分再

服徐徐服之覆令汗神驗

解肌升麻湯治時氣三四日不解方

升麻

芍藥

石膏

麻黃

甘草

各一兩

杏仁

三十枚

貝齒

三枚一作貝母十八銖

右七味以水三升煮取一升盡服溫覆發汗便

愈

葛根龍膽湯治傷寒三四日不差身體煩毒而熱方

葛根

八兩

龍膽

大青

各半兩

升麻

石膏

萎蕤

各一兩

甘草

桂心

芍藥

黃芩

麻黃

各二兩

生薑

三兩

右十二味㕮咀以水一斗煮葛根取八升內餘藥煮取三升分四服日三夜一

治傷寒四五日頭痛壯熱四肢煩疼不得飲食方

梔子仁

黃連

黃蘗

大黃

各半兩

好豉

一升

蔥白

七莖

右六味㕮咀以水八升煮上四物六七沸內後蔥白豉煮得三升頓服一升日三服湯訖溫覆令汗出粉

之得汗便止後服勿復取汗不得汗者復服重發此藥無忌特宜老小神良

七物黃連湯治夏月傷寒四肢煩疼發熱其人喜煩嘔逆支滿劇如禍祟寒熱相搏故令喜煩方

黃連

茯苓

黃芩

各十
八銖

芍藥

葛根

各一
兩

甘草

一兩
六銖

小麥

三
合

右各呔咀以水七升煮取三升冷分三服不能一升者可稍稍服之湯勢安乃卧藥主毒氣服湯之後胸

中熱及咽喉痛皆差其明日復煮一劑如法服之此
湯無毒但除熱下氣安病人小兒服者取三分之一
以水四升煮得二升稍稍服

三七湯治傷寒中風得之三日至七八日不解胸脇痛
四肢逆乾嘔水漿不下腹中宿食不消重下血一日數
十行方

茯苓如雞
子大

黃芩

人參各三
兩

枯萎根四
兩

芒硝

乾地黄各一
升

大黃

麻黃

寒水石 各半

右九味搗篩令相得以散三方寸匕水一升煮令三

沸絞去滓服之日三溫覆汗出即愈病劇與六七匕

五香麻黃湯治傷寒忽發腫或著四肢或在胸背虛腫

浮如吹狀亦著頭面唇口頸項劇者偏著脚脛外如軸

大而不痛不赤著四肢者乃欲不遂悉主之

麝香 兩半

薰陸香

雞舌香

各一兩

沉香

青木香

麻黃

防風

獨活

秦朮

萎蕤

甘草各二兩

白薇

枳實

各二兩

右十三味以水九升煮取三升分三服覆取汗後外摩防已膏

治傷寒三日外與前藥不差脉勢仍數者陽氣猶在經絡未入臟腑方

桂枝

黃芩

甘草各二兩

升麻

葛根

生薑

各三兩

芍藥

六兩

石膏

八兩

梔子 二十七枚

右九味呔咀以水九升煮取二升七合分三服相去
十里久若前兩服訖即得汗後服即停不得汗更進
一服得汗即止不得汗者明日去梔子加麻黃二兩
足水二升再依方服

雪煎治傷寒方

麻黃 斤十

大黃 一斤十二兩金色者

杏仁 三斗四升

右三味呔咀以雪水五斛四斗漬麻黃于東向竈釜

中三宿內大黃攪令調炊以桑薪煮得二斛汁去滓
復內釜中擣杏仁內汁中復炊之可餘六七斗汁絞
去滓置銅器中又以雪水三斗合煎之攪令調得二
斗四升藥成可丸冷凝丸如彈丸有病者以三沸白
湯五合研一丸入湯中適寒溫之立汗出若不愈者
復服一丸密盛藥勿令泄氣

備急千金要方卷三十

欽定四庫全書

備急千金要方卷三十一 唐 孫思邈 撰

宋 林億等 校正

傷寒方

發汗圓第六方

神丹圓治傷寒赤瀋惡寒發熱體疼者方

附子

烏頭 各四兩

人參

茯苓

半夏

各五兩

朱砂

一兩

右六味末之蜜圓以真丹為色先食服如大豆二圓
生薑湯下日三須臾進熱粥二升許重覆汗出止若
不得汗汗少不解復服如前法若得汗足應解而不
解者當服桂枝湯此藥多毒熱者令飲水寒者溫飲
解之治瘡先發服二圓

要畧用細辛不用人參別有射干棗大一枚名赤圓主寒

氣厥
逆

麥奴圓治傷寒五六日以上不解熱在胸中口噤不能
言惟欲飲水為壞傷寒醫所不能治為成死人精魂已

竭心下纔溫以杖發其口開灌藥咽中藥得下則愈麥
奴圓一日黑奴圓二日水解圓

釜底墨

竈突墨

梁上墨

麥奴

黃芩

大黃

芒硝

各一兩

麻黃

二兩

右八味末之蜜圓如彈子大以新汲水五合研一圓
破漬置水中當藥消盡服之病者渴欲飲水極意不
問升數欲止復強飲能多飲為善不欲飲水當強飲
之服藥須臾當寒寒竟汗出便解若服藥日移五尺

許不汗復服如前法不過再三服佳小麥黑勃名麥

奴

宜吐第七

方例

證

例曰大法春宜吐凡服吐藥中病便止不必盡劑也

病如桂枝證頭不痛項不强而脉寸口浮胸中鞭滿氣上衝喉咽不得息者此以內有久痰宜吐之

病胃上諸寒胃中鬱鬱而痛不能食欲得使人按之按之反有涎出不利日十餘行而其人脉遲寸脉微滑者

此宜吐之吐之利即止少陰病飲食入口即吐心中愠
愠然欲吐復不能吐者宜吐之宿食在上管宜吐之
病手足逆冷脉乍結者客氣在胸中心下滿而煩飢不
能食者以病在胸中宜吐之

瓜蒂散病如桂枝證頭不痛項不强寸脉微浮胃中痞
堅氣上撞咽喉不得息者此為胃有寒也宜吐之

瓜蒂

赤小豆

各一兩

右二味治下篩取一錢匕香豉一合熟湯七合煮作

稀粥去滓取汁和散溫頓服之不吐者少少加得快

吐乃止

張文仲以白湯三合和服

水導散治時氣病煩熱如火狂言妄語欲以關

按目錄宜吐第七水導散後尚有藜蘆圓今俱缺其次則宜下第八有例有證有大承氣湯今亦缺而甘遂以下六味正大承氣湯藥品也中間脫落一二葉須覓善本補之

甘遂

兩半

白芷

兩二

大黃

兩四

厚朴

兩八

枳實

枚五

芒硝

合三

右六味哎咀以水一斗先煮厚朴枳實取五升去滓

內大黃煎取二升去滓下芒硝更煎一兩沸分再服

得快利止

抵党圓下血方

水蛭

蜚蠊

各二
十枚

桃仁

二十
枚

大黃

兩三

右四味為末蜜和合分為四丸以水一升煮一丸取

七合頓服之晬時當下血不下更服

抵党湯治同前

水蛭

蜜蟲

各三枚

桃仁

二十枚

大黃

三兩

右四味㕮咀以水五升煮取三升去滓服一升不下

更服

承氣湯方

枳實

五枚

芒硝

半升

大黃

四兩

甘草

二兩

右四味㕮咀以水五升煮取二升去滓適寒溫分三服

如人行五里進一服取下利為度若不得利盡服之
生地黄湯治傷寒有熱虛羸少氣心下滿胃中有宿食
大便不利方

生地黄

三斤

大黃

四兩

甘草

一兩

芒硝

二合

大棗

二十枚

右五味合搗令相得蒸五升米下熟絞取汁分再服
大柴胡姜蕤知母湯治傷寒七八日不解默默心煩腹
中有乾屎讖語方

柴胡

斤半

姜蕤

知母

大黃

甘草

兩各二

人參

黃芩

芍藥

兩各三

生薑

兩五

半夏

升半

右十味㕮咀以水一斗煮取三升去滓服一升日三

即下為效

集驗用枳實四枚不用芍藥

治傷寒頭痛壯熱百節疼痛方

柴胡

梔子仁

芍藥

知母

兩各四

升麻

黃芩

大青

杏仁

兩各三

石膏

八兩

香豉

一升

右十味以水九升煮取二升七分温三服若熱盛加大黃四兩

馱豉圓治傷寒留飲宿食不消方

豆豉

一升

巴豆

去油三百枚
今用二百枚

杏仁

六十枚

黃芩

黃連

大黃

麻黃

各四兩

芒硝

甘遂

各三兩

右九味為末以蜜和丸如大豆服二丸不得下者增

之

崔氏云此
黃素方

發汗吐下後第九

脉證
灸法

方

傷寒已解半日許復心煩熱其脉浮數者可更發汗宜

桂枝湯

凡發汗後飲水者必喘宜慎也

竹葉湯治發汗後表裏虛煩不可攻者但當與此方

竹葉

二把

半夏

半升

麥門冬

一升

人參

甘草

各二兩

生薑

四兩

石膏

一斤

右七味㕮咀以水一斗煮取六升去滓內粳米半升

米熟去之分服一升日三

張文仲不用生薑

桂枝麻黃湯服桂枝湯大汗後脉洪大者與桂枝湯若

形如瘡一日再發汗出便解者屬桂枝二麻黃一湯方

桂枝

一兩十銖

麻黃

十六銖

芍藥

生薑

各一兩六銖

甘草

一兩二銖

杏仁

十六枚

大棗

五枚

右七味㕮咀以水五升煮麻黃再沸去沫內諸藥煮

取二升適寒溫分再服取微汗而已

小青龍湯治傷寒表未解心下有水氣乾嘔發熱而眩或渴或利或噎或小便不利小腹滿或喘者方

桂心

麻黃

甘草

乾薑

芍藥

細辛

各三兩

五味子

半夏

各半升

右八味㕮咀以水一斗煮麻黃減二升去上沫內諸藥者取三升分三服相去十里頃復服之若渴者去半夏加栝蒌根三兩若微利去麻黃加芫花如一雞子大熬令赤色若噎加附子一枚若小便不利小腹

滿者去麻黃加茯苓四兩若喘去麻黃加杏仁半升
數用神效

四物甘草湯治傷寒發汗出而喘無大熱與此方

甘草

兩二

麻黃

兩四

石膏

斤半

杏仁

枚五十

右四味以水七升先煮麻黃令減二升內諸藥
煎取三升分三服

梔子湯治發汗若下後煩熱胸中窒氣逆搶心者方

梔子

枚十四

香豉

四合
綿裹

右二味以水四升先煮梔子取二升半次內豉煮取一升半分二服温進一服得快吐止後服

厚朴湯治發汗後腹脹滿方

厚朴兩半
人參兩一
甘草兩二
生薑兩八

半夏升一

右五味呿咀以水一斗煮取三升分三服

玄武湯治太陽病發汗汗出不解其人仍發熱心下悸

頭眩身暈動振欲擗地方

茯苓

芍藥

生薑各三兩

白朮二兩

附子一枚

右五味㕮咀以水八升煮取三升溫服七合

葛根黃連湯治太陽病反下之利遂不止脈促者表未解喘而汗出者方

葛根半斤

黃連

黃芩各三兩

甘草二兩

右四味㕮咀以水八升先煮葛根減二升次內諸藥煮取二升去滓分再服

茯苓湯治傷寒發汗吐下後心下逆滿氣上衝胸起即頭眩其脉沈緊發汗則動經身為振振搖者方

茯苓

四兩

白朮

桂心

各三兩

甘草

二兩

右四味以水六升煮取三升去滓分三服

凡寸口脉浮關上自沈為結胸

巢治作沈細

凡傷寒病發于陽而反下之熱入因作結胸

太陷胸圓治結胸病頃亦彊如柔痙狀下之即和方

大黃

八兩

芒硝

杏仁

葶藶

各五合

右四味搗篩大黃葶藶餘二味別研如脂和散取如
彈丸大一枚甘遂末一錢匕白蜜二合水一升煮取
八合溫頓服之病乃自下如不下更服取下為效

傷寒六七日結胸熱實其脉沈緊心下痛按之正堅宜
大陷胃湯

太陽病重發汗而復下之不大便五六日舌上乾而渴
日晡有小潮熱心胃大煩從心下至小腹堅滿痛不可
近宜大陷胃湯方

甘遂

末一錢七

大黃

切六兩

芒硝

一升

右三味以水六升先煮大黃取二升去滓次內芒硝一沸次內甘遂分再服一服得快利止後服

甘草瀉心湯傷寒中風醫反下之其人下痢日數十行穀不化腹中雷鳴心下痞堅結滿乾嘔心煩不能得安既見心下痞謂病不盡復下之其痞益甚此非結熱但以胃中虛客氣上逆使之然也宜治之方

甘草

四兩

黃芩

乾薑

各三兩

黃連

一兩

半夏

升半

大棗

枚十二

右六味以水一斗煮取六升去滓分服一升日

三

加人參三兩乃是也

生薑瀉心湯治傷寒發汗後胃中不和心下痞堅乾噫

食臭脇下有水氣腹中雷鳴下痢者方

生薑

兩四

甘草

人參

黃芩

兩各

乾薑

黃連

兩各一

半夏

斤半

大棗

枚十二

右八味以水一斗煮取六升去滓分服一升日

三

白虎湯治傷寒吐下後七八日不解結熱在裏表裏俱熱時時惡風大渴舌上乾燥而煩欲飲水數升者方

石膏升一

知母兩六

甘草兩二

粳米合六

右四味以水一斗煮米熟去滓分服一升日三
諸亡血及虛家不可與白虎湯若立夏後至立秋前
得用之立秋後不可服春三月尚凜冷亦不可與之
與之則嘔利腹痛

傷寒無大熱而口乾渴心煩背微惡寒宜服白虎湯

傷寒脉浮發熱無汗其表不解不可與白虎湯渴欲飲

水無表證宜白虎湯

若渴欲飲水口燥舌乾者亦宜白虎湯

青箱子圓治傷寒後結熱在內煩渴者方

青箱子

五兩

黃芩

括蕒根

苦參

各一兩

黃蘗

二兩

龍膽

梔子仁

黃連

各三兩

右八味為末蜜丸如梧桐子大先食後服七丸日三

不知稍加本云錫和為丸

大青湯治傷寒熱病十日已上發汗不解及吐下後諸藥不除及下利不止斑出皆治之方

大青四兩

甘草

阿膠各二兩

豆豉一升

右四味㕮咀以水八升煮取三升去滓煮三沸去豉

內阿膠令烱頓服一升日三服欲盡復作常使有餘

渴者當飲但除熱止吐下無毒深師治勞復肘後有赤石脂三兩胡洽集

同驗

治傷寒後不了了朝夕有熱如瘧狀方

知母

二兩

麻黃

甘草

芍藥

黃芩

桂心

各一兩

右六味㕮咀以水七升煮取二升半服五合日三溫覆令微汗若心煩不得眠其人欲飲水當稍稍飲之令胃中和則愈

江南諸師祕仲景要方不傳

灸法初得病或先頭痛身寒熱或瀼瀼欲守火或腰背

強直面目如飲酒狀此傷寒初得一二日但烈火灸心
下三處第一處去心下一寸名巨闕第二處去心下二
寸名上管第三處去心下三寸名胃管各灸五十壯然
或人形大小不同恐寸數有異可繩度隨其長短寸數
最佳取繩從心頭骨名鳩尾頭度取臍孔中屈繩取半
當繩頭名胃管又中屈半繩更分為二分從胃管向上
度一分即是上管又上度取一分即是巨闕大人可灸
五十壯小兒可三壯亦隨其年灸之大小以意斟量也

若病者三四日以上宜先灸胸上二十壯以繩度鼻正
 上盡髮際中屈繩斷去半便從髮際入髮中灸繩頭名
 曰天聰又灸兩顛顛又灸兩風池又灸肝輸百壯餘處
 各二十壯又灸太衝三十壯神驗



備急千金要方卷三十一

總校官中書臣朱 鈐

校對官中書臣胡紹基

謄錄監生臣秦聯登